

R

obert hubert jeand'or

Robert un persona door di su personalidad a haya atencion di su pueblo y di tur hende na unda e a yega di biaha rond mundo


- Robert ta bini di un famia humilde
- A kibra e prome rekord ganando tres festival di tumba tras di otro
- A canta den e grandinan tur rond di mundo
- Un cantante stima pa su pueblo
- Actualmente e tin su propio conhuntito
- Kizas un futuro politico?

Tabata un mainta cu nos a cita Robert na Residencia Silvia pa un entrevista. Nos ta considera Robert un di e artistanan di Aruba, cu tabata sa di a hiba nomber di nos pais tur rond di mundo. Nos a keda asombra con stima e famia aki ta den comunidad y cu fayecimento di nan querida mama, nos mira e aprecio grandi cu pueblo tin pa famia Jeand'or. Su rumannan ta hendenan hopi activo ariba diferente tereno den nos comunidad. Robert mes ta haya cu su famia tin bon aprecio pa su persona y cu ta sigi su consehonan; esaki e ta kere door di su logronan tanto aki na Aruba como internacional. Robert ta un persona hopi carismatico y manera e mes ta bisa cu nunca e a laga fama subi su cabez. Robert ta un persona sumamente creyente y esaki ta hacie cu e ta un persona hopi transparente na unda cu no tin espacio pa maldad por domine.

Robert a yega un poco mas laat cu e ora palabra, pero e tabata tin un bon disculpa, pasobra e mester a cumpli cu acto hopi importante. Nos fotografo oficial señora Donna Oduber a cuminsa pa tuma potretnan di Robert y na un manera profesional esaki a tuma lugar pa asina haya e mihor tomanan cu bosonan por goza di dje den e articulo aki.

Prome cu nos a cuminsa cu e entrevista nos papia ariba diferente topiconan y Robert tin grado di inteligencia cu bo por hiba un combersacion diversifica y hopi interesante cune.

Robert Hubert Jeand'or a nace dia 10 di mei, 1954, ta casa y ta tata di dos yiu. Un di e yiunan ta for di matrimonio, esta e a bira tata prome cu e a drenta matrimonio cu su actual esposa. Robert ta bin di un famia di 11 ruman y fuera di esaki su tata tambe tin un otro yiu.



Su infancia

Di su infancia Robert ta corda cu e tabata hunga softball, e tempo ey e bala tabata ser traha cu mea, esta un mea yena cu paña. Nan tabata core den mondi, e tempo ey awa tabata yobe hopi, nan tabata coi maripampoen, dader, piki fruta di bushi. Na Madiki nan tabata biba.

E ta corda cu nan tabata hunga rond di e dam patras di nan cas awendia Driemasterstraat, crusada Santa Helena.

Robert ta corda cu tabata tin un Venezolano banda di nan cas y tabata tin dos baca y nan, esta e y su rumannan tabata bai Hydroponics pa piki e blachinan di tomatie pa e bacanan come.

E ta corda cu su tata semper tabata PPA, pero Shon A difunto di AVP tabata bin su cas y pidi su tata pa su rumannan yuda den repartimento di panfleta, bandera etc. E tempo ey politica ta otro y e no tabata ser hiba cu e odio cu nos conoce awendia. Tabata tin respet pa otro nan opinion ariba e tereno di politica. Robert ta corda algun di e amigonan di e tempo ey di su famia, manera Robby, Sha, Jais, tata di Karel Arends. Tambe nan tabata bon amigo di famia Kemp.

Robert y su rumannan tabata bai scondi wak caredanan, pustamento di auto cu tabata tuma lugar na Malmok un poco panord di e hotelnan grandi; e ta corda fria cabes, e camaro cora, AMG, e chevelle di Juan Maduro di Santa Cruz, tabata tin e Boss berde y e torino di Shon Pa, color geel. Nan tabata haci esaki scondi sin cu nan mayornan tabata sa.

Despues nan a bai biba na Venezuelastrat cruzada di Driemasterstraat panord di United Diner y pabow di nan cas tabata tin un veld di bala, un veld chikito cu nan tabata yame veld cora, pasobra e tera tabata cora y ora cu nan baña e awa ta keda cora, cora. Nan tabata core den mondi tira conew, yuwana cu scopet di kelki caliber 22.



Robert ta considera cu e tabata tin un infancia felis y ohala cu e muchanan di awendia por tin un infancia, manera esnan di antes, na unda nan por a wak un cunucu planta, hydroponics etc.

Fuera di musica e ta corda tambe cu nan tabata core tras di burico, gara nan, pone number pa nan y pone nan pusta. Tambe e a mira cabainan pusta. Ainda e ta corda hopi number di cabai y buriconan, tabata tin dos burico famoso cu nan tabata yama nan Schoen y L.C.

E cabainan famoso tabata Jo Amstel, Black Fury, Sheyk, Dalveer, Clarú, mama di mayoria di e cabainan na Aruba.

No tabata facil pa nan na cas. Nan a pasa trabow, pasobra nan tabata 11 ruman y nan tata tabata traha na WEB y tur ruman tabata bai skol. Di momento cu nan tata a bira malo y su tata no por a bai trabow; e tabata tin algo na su pia y esaki a causa tambe su morto. Su mama d.f.m. a bisa nan, boso tata a fayese, pero su leynan ta keda.

Apesar di tur circunstancia dificil cu nan a pasa aden, nan tabata feliz cu

otro; tur e rumannan. Nan tabata lidia cu cabrito, galiña, porco, hopi otro bestia, nan tabata pasa pret y e bestianan a bira parti di nan bida.

E ta corda cu nan tabata tin un yuwana hopi manso cu tabata drumi den porta di nan cushina y e hendenan tabata tin miedo pa a dreña nan cas. E tabata bai mondi, pero e tabata bolbe bin cas, e tabata manera un mascota di famia.

E ta corda con e cu su ruman Karel awe Polis, John cu ta traha na Dina y un par di otro amigonan Toppenberg di Madiki, rumannan Abath y otro amigonan a planta matanan di fruta den cura di e frèrenan; e ta corda algun di e frèrenan, Casper, Paulinus, Servacio, frèr chikito, Alexius y otro. Awendia e cas di frèrenan a bira Universidad di Aruba, kizas nan no sa cu ta e grupo aki a planta tur e matanan. Den cura patras di e cas di frèrenan tabata tin palo di mango, di tamarijn, di lamoenchi, di kenepa y tambe un vijver yen di pisca. Nan a haci tur esaki pa amor.

Por menciona cu nan tabata tin un infancia sano; nan a lanta pa ta bon mucha y awendia ainda e tin e costumber bunita aki di

planta. Awor mes e a pidi Domeinbeheer un pida tereno patras di su cas pe plant'e cu mata di fruta y cu e tin gana o cu lo e hacie un parke cu e lo yame Parke Jesus. E kier hacie ariba su mes.

Nos a puntra Robert si e tabata haya falta di algo tempo di su hubentud, Robert a contesta nos cu p.e. awendia airco no ta un luho mas, antes e tabata un luho, 98 % di nos pueblo no tabata tin airco. Den nos barío den Madiki un famia tabata tin television, tur hende

di e bario tabata sinta pafor pa wak television, tabata famia Kemp. Awendia famianan tin 3 television y diferente aircu. Robert a conta nos cu nan tabata cana for di Madiki te na Bubali pa bishita un tanta. Cu luna cla tur rumannan tabata sali cana y tabata tin amigo cu tabata sconde y grita manera alma malo pa spanta e otro, nan tabata hacie pa pret. Awendia bo no ta haya e cosnan aki mas. E ta corda con nan tabata bai piki druif na Eagle, tabata tin hopi palonan di druif, awor ta yena cu edificio. Despues cu nan caba di piki druif nan tabata landa, tin ora nan tabata lanta 5'or di marduga pa bai na pia te na Eagle beach pa nan por warda un di e hutnan pa asina nan por pasa un dia agradabel cu otro. Tambe Robert a conta nos con nan tabata bai coi amandel y den Companashi tabata tin un fruta cu bo no ta haya mas, nan tabata yame zuurtje.

Despues cu Robert a termina TEM-stroom na John F. Kennedy skol, e a bai traha na Antillean Mercantile, cu a bira despues Unicon, cu tabata situa panord di Royal Plaza. Robert a traha 8 aña como magazijnmeester, te cu e dia di awe e tin hopi experiencia ariba e tereno aki.



Ariba e tereno musical

Nos a puntra Robert kiko a cambia su bida cu e a bai dedica na musica riba cual e a contesta nos cu ta for di chikito e tabata gusta musica. E ta corda cu su 6 pa 7 aña e a cuminsa canta y despues e a drenta un grupo di aguinaldo. Su ruman Frenk a hibe canta cu Blanca Palomitas na Tanki Leendert, den e barak, esta e edificio biew. Di e tempo ey su bida musical pa subi caya a cuminsa.

Nos tabata curioso pa sa su exitonan ariba e tereno aki na Aruba, y e a bisa nos di a kibra e prome rekord di gana 3 aña tras di otro e festival di tumba, esta na 76, 77 y 78, esaki tabata un gran logro y e a obtene e triple corona.

Na Aruba e a toka y canta den Alma Solis.

Den Blancas Palomitas y Los Juveniles, Vito Oduber tabata nan manager.

Nos a puntra Robert si e tin un talento special y e a conta nos su uitstraling; for di chikito e ta kere cu e a nace cune, tur hende tabata wak ariba dje y te cu e dia di awe, nunca e cos aki a kita.

For di tempo di Blancas Palomitas nan tabata considere como un idolo y ora e tabata yega pa practica semper su mes un compañeronan tabata ricibie cu aplauso. E ta kere cu esaki ta un don cu Dios a regale, pesey e ta dedica su bida musical na Dios y no ta haci malo na ningun hende. Rond mundo den e mundo farandulero ta existi envidia y artistanan no ta importa pa pasa ariba otro contal nan logra nan meta. Semper e ta pensa cu e tin cu debolbe algo na Dios y ta hacie cu bondad. Nunca e a haci daño na ningun musico, alcontrario e ta gusta yuda.

E no ta gusta corrupcion. Den exterior e a wak esaki sosode hopi, pero semper e a tene su mes lew, e ta kere cu musiconan mester ta leal cu otro.

Un hende mester corda cu cada corrupcion ta wordo marca pa Dios y e final lo no ta bon. Corda ora bo muri tur cos ta keda atras. Loke cu keda atras segun Robert ta caba na nada, debi na e mal maneho pa a yega na e sistema ey.



Robert su bida Internacional

Johny Ventura a bin Aruba y a mira su talento y e ta e pionero di e exito di Robert ariba e tereno Internacional. Johny a mira mas lew cu Robert mes a mira e tempo ey. Den exterior e tabata tin un bon number, kizas mas cu hopi otro artistanan di cualkier pais Latino cu ta purba di logra esaki.

E a presenta na Santo Domingo, rond Merca, Sur America, Europa den varios pais y casi den tur paisnan di Caribe. Cu Johny Ventura e a logra 60 % y cu Los Hijos del Rey 40% di e presentacionnan aki.

E tabata hopi stima y admira na Santo Domingo y ariba un muraya na unda artistanan famoso ta pinta o nan tin nan caricatura, Robert su potret tambe ta aparece. Den e studio di grabacion EMCA, tin un cuadro grandi di un artista famoso cu a fayese y hopi artistanan grandi a pone nan firma ariba dje y Robert tambe a ser aserca pa haci esaki. Tabata un honor pe. Su firma ta ser cataloga entre e grandinan.

El Negrito del Batey, Alberto Betran d.f.m., tin un camisa cu e tabata bisti na ocasion especial. E ta laga nan borda ariba e camisa aki number di artistanan famoso. Un biaha cu Robert tabata grabando e a mustra Robert cu su number tambe ta aparece ariba su camisa.

E tabata tin un bida alegre di ta entre artistanan mas grandi di mundo. E tabata tin fe cu un dia e lo actua na unda Celia Cruz, Fania All Stars, Johny Pacheco, Gran Combo a actua y su soño a keda cumpli; e tambe a comparti o actua ariba e escenarionan aki.

Na Santo Domingo e tabata un personahe y unda e tabata bai nan tabata conoce, mescos cu aki na Aruba.

Awor bo ta haya hopi hende cu ta prepotente y nan ta lubida nan publico. Ora un persona ta humilde e ta logra hopi, nunca lubida con bo a nace di unda bo a bin, con bida tabata ta. Un pover ta bira rico y ta lubida su pasado. Robert mes ta considere hopi humilde y ta papia cu tur hende, semper e ta cla pa entrevista, firma autografo y semper e ta habri pa tur cos.

Na Santo Domingo e tabata tin su propio banda cu e number Robert Jeand'or y Orkesta, un logro grandi. Na Republica Dominicana tin mas di 200 agrupacion musical. E ta considera cu e tabata tin cierto exito cu e banda, pero pa mantene un banda asina ta nifica hopi placa tambe. E ta un inversion grandi bo ta perde tur cos, loke cu a pasa cune tambe y cu hopi otro artistanan mas. E mundo ey ta exigí un sistema economico fuerte. Awendia e ta peor, e ta hopi mas grandi. Den un miyon uno ta bira famoso pa naturalesa y restonan ta bira famoso den un forma sushi, esta cu ayudo di mafia y e nunca lo acepta esaki.



Na Aruba bek

Santo Domingo mescos cu otro paisnan Latino a cuminsa pasa den situacionnan economico dificil, e inflacion na Santo Domingo tabata grandi y su amigonan mes a consehe pe bolbe Aruba. Politica den Latino America semper ta den miseria y pobreza.

Tambe e a pensa ariba estudio pa su yiu homber. E a nota ora cu e a bin bek cu hopi yiunan di tera bon studia ta ser poni un banda pa hendenan di afor tuma over. Negoshinan grandi ta den man di stranhero, nan ta haya e mihor oportunidad. E Arubiano no ta haya e posibilidad pa bai padilanti.

Robert tin 9 aña ta toca happy hour na Marriott Hotel y e tin 13 aña cu su propio banda Robert y su Banda Show.

Nos no por a keda sin puntra Robert si nos artistanan local ta haya suficiente reconocimiento y ta haya cu no manera mester ta, nan a manda un beleidsnota ya pa 2 aña y mei y te cu dia di awe nan no a haya ningun reaccion. Tanto bal cu Arubianonan a bringa pa haya Status Aparte, cu a haci Aruba crece, pero falta ordo y leynan, pa reconocimiento pa nos propio hendenan. Artistanan mester haya mas atencion.

Pakiko un Status Aparte, un unidad Arubano, cu awe ta nos traicion. Enbez cu e ta na fabornan di nos hendenan, e ta traha contra, ki dia esaki ta cambia.

Nos no por keda sin menciona cu Robert a graba varios biaha cu Juan Luis Guerra en total 4 produccion, e ta sintie orguyoso di ta e prome Antiyano cu forma parti di Juan Luis Guerra tempo cu e a gana e premio Grammy, esaki ta un reconocimiento mundial.

Cu Sonora Matacera tambe su number ta aparece. Den nan buki di historia.



Politica

Nos a puntra Robert, debi cu tin hopi rumornan, cu si ta berdad cu e lo bai ariba un lista politico den e proximo eleccion y e a contesta nos hopi franco, varios partido a combersa cune, manera PPA, AVP, Red Democratico y Democracia Real, pero ora cu e bisa nan kiko e ta pensa di politica y kiko nan mester cambia nan ta haya cu e ta mucho fuerte. E mes ta kere

cu e ta hopi honesto y ta gusta pa cosnan ta otro y cu cierto leynan lo ser cambia y mester bin mas respet.

Hopi di nan no a bolbe mas, e unico cu te ainda e tin bon contacto ta cu e hendenan di PPA, cu ta mas habri pa critica y sugerencia. E ta kere cu e por funciona como un consehero general, pasobra e sa hopi di politica y tur e biahenan cu e a haci internacionalmente e a siña hopi di politica.

Na Aruba cada Minister ta tuma nan desicion manera nan ta haya ta bon y e Prome Ministro no tin control ariba esaki. E ta haya si un Minister mester comete un error, anto mester ser castiga, mescos cu cualkier ciudadano. Leynan mester ser cambia na unda Prome Ministro mester tin mihor control ariba su Ministronan.

Con ta posibel cu un Minister ta haya un K.B., anto e ta pone su ruman na e posicion di Ministro, mientras tur e otronan cu a aparece ariba lista ta ser laga un banda. Pueblo no a vota pa e ruman, esaki ta falta di respet, pa tur esnan cu si tabata ariba lista cu nos ta bin na remarca pa un posicion asina, pasobra tur cos mester keda den famia. Robert ta kere cu Prome Ministro tabata fout y e mester a tuma accion.

Robert mes ta haya cu Parlamento no ta funciona, con ta posibel cu ainda no a pasa un ley pa castiga esnan cu ta transporta ilegalnan, e palabra ilegal mes ta papia pa su mes y ta hopi tempo caba cu esaki ta andando y ainda Parlamento, Parlamentarionan no por traha un ley pa castiga esnan cu ta comete esakinan.



Robert su mensahe

Sistema di politica mester cambia total, nos leynan, no grita na emisornan radial y no haci nada. Politiconan ta menos positivo. Nan ta cabando cu nos pais pa un grupo di hende keda bon. Pakiko leynan ta tarda pa ser cambia, kiko ta di nos futuro generacionnan.

Ta hendenan di afor lo tuma over, hasta por yega asina lew cu nan lo cambia Aruba su number.

A yega tempo pa pueblo habri nan wowo.

Tabata un entrevista hopi interesante y nos ta desea Robert tur clase di exito cu su plannan pa futuro y nos ta sigur conociendo e honestidad di Robert cu e por logra hopi. ❀

